

Պատմութեան թանգարանի քարտէզինը (որը դաշտը Մակու-չայի ստորին հոսանքում է նշում)²², ինչից յետոյ կանգ է առնում Ս. Երեմեանի տեսակէտի («Մակուից հարաւ, Ղարաքիլիսայի շրջակայքում») քննադատութեան վրայ՝ փորձելով մատնանշել ինչ-ինչ փաստարկներ, սակայն զարմանալիօրէն բռնորն էլ՝ ակնյայտ սխալ²³: Օր.՝ որ իբրեւ թէ Ս. Թադէի ճորահովիտը հեռու էր հնում յայտնի մեծ ճանապարհներից (՝), կամ՝ որ վանքից հարաւ ընկած ընդարձակ «Շաարշականի սարահարթով» հոսող Մակու-չայ գետն իբրեւ թէ փոքր է՝ Աւարայրի դաշտի Տղմուտը համարուելու համար (՝): Այդ կերպ է նրան հեշտ թում ընթերցողին մատուցել Կոտորի Աղ-չայ վտակի ափերին, այսինքն՝ Արտագի սահմաններից դուրս ընկած Ղարագիաղիին դաշտի տարբերակը: Անշուշտ, աղբիւրագէտն իրաւունք չունի այդ աստիճան անտեսել մատենագրական ուղիղ տեղեկութիւնները Աւարայրի՝ Արտագ գաւառում գտնուելու մասին, բայց բառացի հէնց դա է անում Հ. Աղաբէկեանը՝ գրելով. «...դաշտը պէտք է գտնուի կա՛մ Հերի եւ Զարեանդի հիւսիսային մասում, կա՛մ էլ Ճուարշ-ռոտում, իսկ քանի որ նշուած վայրերում միայն մէկ գետ կայ՝ Աղ-չայ գետը, հետեւաբար եւ Աւարայրի դաշտը պէտք է այստեղ գտնուի»²⁴: Թէպէտ՝ յանուն արդարութեան նաեւ նշելի է, որ Արտագի յիշատակումների նմանատիպ անթոյլատրելի անտեսման վրայ է հիմնուած Աւարայրի տեղորոշման տարբերակների կէսից աւելին (7-8-ը):

1988 թ. Հ. Աղաբէկեանի տեսակէտը հիմնաւորապէս քննադատուեց Հմ. Մարտիրոսեանի կողմից²⁵, սակայն չնայած դրան՝ ներկայումս այն ամենից շրջանառուն է դարձել: Կարծում ենք, որ դրա պատճառը խիստ պարզունակ է. Հ. Աղաբէկեանի վարկածը հասցրել է թափանցել մի շարք ընդհանրացնող գործեր՝ «Հայկական սովետական հանրագիտարան», «Հայկական համառօտ հանրագիտարան»²⁶ ու «Հայաստանի եւ յա-

²² Նոյն տեղում, էջ 97:

²³ Նոյն տեղում, էջ 97-98:

²⁴ Նոյն տեղում, էջ 113: Հմմ. Մարտիրոսյան 1988, 82-83:

²⁵ Մարտիրոսյան 1988, 83-85: Տաւօք, այդ հիմնաւոր քննադատութիւնից յետոյ հեղինակը փորձում է Աւարայրի դաշտը տեղադրել Մակու-չայ գետի ձախ վտակ Ղարաստի (նաեւ՝ Աղ-չայ, Աաջիկչայ՝ ակունքը Վասպուրականի լեռներում, գետաբերանը՝ Մակու քաղաքից մի փոքր արեւմուտք) հովտի Օվաջիք գաւառակում՝ Քիլիսաքենդ գիւղի շուրջը, որի միջով անցնում է Խոյ – Ղարաէյնի – Բայազէտ վերոնշեալ ուշմիջնադարեան մայրուղին: Բայց չէ՞ որ այդ շրջանը մաս էր կազմում ոչ թէ **Արտագի**, այլ նրա արեւմտեան հարեան **Մարդաստան** գաւառի:

²⁶ Տե՛ս Հ. Աղաբէկեանի՝ «Աւարայր [գիւղ]» եւ «Աւարայրի ճակատամարտ 451»՝ արդէն յետմահու յօդուածները «Հայկական սովետական հանրագիտարա-